

Ho Tloha Boipolelong ho ea Matšelising



SABATHA MANTSIBOEA

Bakeng sa Boithuto ba Beke Ena Bala:

Daniele 9; Jer. 25:11, 12; 29:10; 2 Marena 19:15–19; Matt. 5:16; Jakobo 5:16.

Teman'a Khopolo:

“ ‘Morena, ak’u mamele! Morena, u tšoarele! Morena, u ele hloko, u etse! Se liehe, ka baka la hao, Molimo oa ka, etsoe motse oa hao le sechaba sa hao li bitsitsoe ka lebitso la hao’ ”(Daniele 9:19).

Daniele 9 e phuthetse e ‘ngoe ea lithapelo tse matla ka hare ho Bibeile. Metsotsong e mahlonoko ea bophelo ba hae, Daniele ho balehela thapelong hore a tsebe ho ba le matla a ho tobana le liphephetso tse kapele ho eena. Ha Daniele le balekane ba hae ba le makhatheng a ho bolaoa ka lebaka la toro ea sephiri ea morena oa mohedene, moprofeta o ile a atamela ho Molimo ka thapelo (Daniele 2). Eare ha taelo ea morena e thibela ho rapela Molimo o fe kapa o fe ha e se morena feela, Daniele a tsoela pele ho etsa thapelo ea hae ea letsatsi le letsatsi a shebile ‘nqa ea Jerusalema (Daniele 6). Ka mokhoa o joalo, ha re talima thapelo ea Daniele 9, ha re hopoleng hore pono ea matsatsi a 2,300 a baloang mantsiboea le hosasa e ho Daniele 8 e ama moprofeta haholo. Leha lintlha tse akaretsang tsa pono eo li ile tsa hlahosoa, Daniele o sitoa ho utloisisa bolelele ba nako e hlahellang puisanong ea bahalaleli ba babeli: “E tla ba likete tse peli tse nang le makholo a mararo a baloang mantsiboea le hosasa, sehalalelo se ntoo hloekisoa” (Dan. 8:14). Ke hona joale feela, khaolong ea 9, moprofeta a neoang leseli le eketsehileng, ‘me lekhetlong lena, hape, le tla e le karabelo ea thapelo e tiileng.

**Ithute thuto ea beke ena ho lokisetsa Sabatha sa la 7 Tlhakubele .*

Lentsoe la Molimo ke Khubu

Bala Daniele 9:1, 2. Daniele o re o ile a “Utloa ka libuka” boprofeta boo a neng a ithuta bona ka hloko e kholo. O bolela libuka kapa buka e fe ea Bible?

Ha re talima thapelo ena, ho ea hlaka hore e hlahisoa ke boithuto bo tebileng ba litšenolo tse fetileng tsa Molimo ho Moshe le baporofeta. Kamor’a ho ithuta lengolong la Jeremia hore nako ea kholeho ea hae e tla ba lilemo tse mashome a supileng (sheba Jer.25:11, 12; Jer. 29:10), Daniele a utloisisa bohlokoa ba nako ea nalane eo a phelang ho eona. Ha re eleng hloko hore Daniele o etsa thapelo ena ka selemo sa 539 B.C., selemo seo ka sona ‘muso oa ba-Persia o neng o nkela Babilona sebaka. Ka hoo, ho fetile lilemo tse mashome a supileng esale Nebukadnesare a hlotse Jerusalema ‘me a senya tempele. Kahona, ho ea boprofeta ba Jeremia, sechaba sa Molimo se se se ea khutla naheng ea habo bona. Ka ho tšepa Lentsoe la Molimo, Daniele oa tseba hore ho na le ntho e kholo e haufi le ho etsahala ho sechaba sa habo le hore, joalo kaha Molimo o tšepisa Lentsoeng la Hae, kholeho ea Babilona e se e ea fela ‘me ba-Juda ba tla khutlela lehaeng la bona.

Ho tsoa boithutong ba hae ba Mangolo a teng, Daniele o hlokomela kamoo libe tsa sechaba sa habo li tebileng kateng. Hobane ba robile selekane, ba khaotse maqhama a bona le Molimo; ‘me litholoana tsa hona, ke kholeho (Lev. 26:14–45). Ka mokhoa o joalo, ke boithuto ba Daniele ka litšenolo tsa Molimo bo mo fang mohopolo oa bohlokoa ba ho bua le Molimo sebakeng sa sechaba sa habo.

Ha re atamela matsatsi a ho qetela a nalane ea lefatše, re hloka ho ithuta le ho phela ho latela Lentsoe la Molimo ho feta nakong e fe kapa e fe. Ke Lengolo feela le ka re fang tlhaloso ea ‘nete ea lefatše leo re phelang ho lona. Haholo hobane Lengolo le re phetela pale ea ntoa e kholo pakeng tsa botle le bobé, ‘me ka mokhoa o joalo le senola hore nalane ea motho e tla fela ka timetso ea bokhopo le ho hlongoa ha ‘muso oa Molimo o sa feleng. Ha re tsoela pele ho ithuta Mangolo, re hola kutloisong ea rona ea maemo a hona joale a lefatše le sebaka sa rona ho oona, hammoho le mabaka a ho ba le tšepo lefatšeng le sa faneng ka eona.

Bible e re thusa joang, ho fihlela boemo bo itseng, ho utloisisa lefatše leo ka bolona, ho leng bonolo hore le se utloisisehe ho hang?

Kopo ea Mohau

Bala Daniele 9:3–19. Daniele o etsa kopo ea hae ea mohau a ipapisitse le eng?

Re lokela ho ela hloko lintlha tse seng kae thapelong ena. Ea pele, ha ho moo thapelong ea hae Daniele a kopang tlhalosetso ea litlhokotsi tse oetseng sechaba sa ba-Juda. O tseba lebaka. Efela, boholo ba thapelo bo tletse ka moo Daniele ka sebele sa hae a phetang lebaka: “Ha rea ka ra utloa lentsoe la Jehova, Molimo oa rona, ho ea ka melao ea hae eo a neng a e beile pel’ a rona ka baporofeta, bahlanka ba hae” (Dan. 9:10). Moo re qetetseng ha Daniele a batla kutloisiso ea se seng ke qetellong Daniele 8, ha a ne a re ha a utloisise pono ea matsatsi a 2,300 a baloang mantsiboea le hosasa (sheba Dan. 8:27). Ntlha ea bobeli e thapelong ena ke kopo ea mohau oa Molimo, ea boikemisetso ea Molimo ba ho tsoarela leha ba entse sebele le bokhopo. Ka mantsoe a mang, mona re bona ponahatso e matla ea evangeli, ea batho ba baetsalibe ba se nang makhabane ao e leng a bona, leha ho le joalo ba kopa mohau o sa batsoaneleng le tsoarelo eo ba sa e sebeletsang. Na oo ha se mohlala oa boemo boo re leng ho bona ka bo mong, kapele ho Molimo?

Bala Daniele 9:18, 19. Daniele o fana ka lebaka le fe hape la hore Molimo a arabele thapelo ee?

Re lokela ho ela hloko lehlakore le leng la thapelo ea Daniele: boipiletso ba tlotliso ea lebitso la Molimo. Ke hore, thapelo ha e susumetsoe ke molemo oo e ka o hlakisetsang Daniele kapa sechaba sa habo, empa ka lebaka la lebitso la Molimo (Dan. 9:17–19). Ka mantsoe a mang, karabo e fanoe hobane e tla tlisa tlotla lebitsong la Molimo.

Bala 2 Marena 19:15–19. Thapelo ea Ezekiasi e tsoana le ea Daniele joang? Mattheu 5:16 e reng ka tsela eo le rona re ka tlotlisang Molimo?

Boleng ba Bobuelli

Bala Daniele 9:5–13. Ke eng se leng bohlokoa ka hore Daniele o lula a ntse a re “re” fositse, ka mokhoa o joalo a ntse a ikenyelletsa libeng tse qetelletseeng li tlisitse tlokotsi e joalo sechabeng?

Thapelo ea Daniele ke e 'ngoe ea lithapelo tsa bohlokoa tsa bobuelli tse phuthetsoeng ke Bible. Lithapelo tse joalo li ama pelo ea Molimo, li emisa kahlolo 'me li tlisa topollo lireng. Ha Molimo a ne a ikemiselitse ho timetsa sechaba sohle sa ba-Juda, bobuelli ba Moshe bo ne bo thiba letsoho la Hae (Exod. 32:7–14, Num. 14:10–25). Le ha komello e mpehali e batla ho metsa naha, Molimo a arabela thapelo ea Elia 'me a nesa pula ho tsoosolosa naha (1 Marena 18).

Ha re rapella litho tsa lelapa, metsoalle, le batho ba bang, kapa maemo, Molimo o utloa lithapelo tsa rona 'me o tla kena lipakeng. Ka nako tse ling ho nka nako e teletsana hore thapelo e arabeloe, empa re ka ba le tiisetso ea hore Molimo ha o ka ke oa lebala lithoko tsa bana ba Hae (sheba Jakobo 5:16).

Boemong bona, Daniele o nka karolo ea 'muelli, kapa mokena-lipakeng, mahareng a Molimo le sechaba sa habo. Boithutong ba hae ba Mangolo, moprofeta o hlokomela kamoo sechaba se teteletseng sebeng kateng ha ba tlola molao oa Molimo 'me ba hana ho utloa lithokomeliso tsa Molimo. Ka mokhoa o joalo, ha a eelloa boemo ba bona ba semoea bo tlokotsing, Daniele a rapella pholiso le tsoarelo. Empa hape moprofeta o ikamahanya le sechaba sa habo. Ka mekhoha e meng Daniele o bontša mosebetsi oa Krete e le 'muelli oa rona (Johanne 17). Leha ho le joalo, ho na le phapano e kholo: Krete “ha a na sebe” (Ba-Heb. 4:15) kahona ha a hloke ho bolela libe tsa hae kapa ho etsa mahlabele a hore a tsoareloe (Ba-Heb. 7:26, 27). Empa o ikamahanya le baetsalibe ka tsela e ikhethang: “Hobane ea sa kang a tsebe, Molimo o mo entsa sebe ka baka la rona, re tle re beoe ka eena ba lokileng pel'a Molimo” (2 Ba-Kor. 5:21).

“Haeba u ne u ka bokella ‘nqa e le ‘ngoe tsohle tse molemo le tse halalelang le tse bokhabanele tse ratehang mothong e be o mo hlahisa ho manyeloi a Molimo e le ea nkang karolo pholosong ea moea oa motho ka makhabane, khothaletso eo e ne e ka hanoa e le bohlabaphieo.”—Ellen G. White, *Faith and Works*, leq. 24. Mantsoe aa a re ruta'ng ka bohloki ba rona ba ‘Muelli sebakeng sa rona?

Mosebetsi oa Mesia

Thapelo ea bobuelli ea Daniele e sebetsana le lintlha tse peli tse khathatsang: libe tsa sechaba le lithako tsa Jerusalema. Kahona, karabo ea Molimo e amana le likopo tse tsa peli. Batho ba tla lopolloa ka mosebetsi oa Mesia ‘me sehalalelo se tla tlotsua. Likopo tse ikhethileng tse peli, leha ho le joalo, li arabeloa ka litsela tse tlolang meeli ea nalane ea Daniele: mosebetsi oa Mesia o tla tsoela leloko lohle la botho molemo.

Bala Daniele 9:21–27. Ke mosebetsi o fe o neng o lokela ho etsua nakong ea libeke tse 70? ‘Me ke hobaneng ha e le Jesu feela ea neng a ka o phetha?

1. “Ho koalla bobee.” Lentsoe la se-Heberu bakeng sa “bobee” (pesha‘) le bolela litlōlo tsa ka boomo tse etsoang ke e monyane khahlanong le e moholo (mohlala, Liprov. 28:24). Lentsoe lena le hlaha hape ka Bibeleng mabapi le ha batho ba nyelisa Molimo pepenene (Ezek. 2:3). Ka mali a Jesu, leha ho le joalo, bokoenehi khahlanong le Molimo bo ea felisoa ‘me batho ba neoa makhabane a phallang ho tsoa Kholekhotla.

2. “Ho felisa sebe.” Leetsi leo le phuthetse moelelo oa “ho koahela,” ‘me mona e bolela hore sebe se tšoaretsoe. Ho tloha ho oeng, ha esale leloko la botho le sitoa ho phela ka lipheho tsa Molimo, empa Mesia o tla jara mefokolo ea rona.

3. “Ho phekola bokhopo.” Joalo kaha Paulose a bolela: “Hobane botlalo kaofela bo ratile ho ikahela ho eena; le ho busetsa lintho tsohle khotsong ea Molimo ka eena, leha e le tse lefatšeng, leha e le tse maholimong, kahobane e le eena a entseng khotso ka mali a sefapano sa hae” (Ba-Kol. 1:19, 20). Mona, le teng, ke Jesu feela ea ka phethahatsang taba ena.

4. “Ho hlahisa ho loka ho sa feleng.” Krete o ile a nka sebaka sa rona sefapanong ‘me kahona a re nea boemo bo hlohonolofetseng ba “ho beoa ba lokileng” ho Molimo. Re ka amohela ho loka hona ka tumelo feela e tsoang ho Molimo.

5. “Ho tiisa pono le boprofeta.” Ha Krete a ipheha sehlabelo, boprofeta ba Testamente ea Khale bo neng bo supa tšebetso ea Hae ea tefelo bo ne bo tiisoa ka tsela ea hore bo ne bo phethahatsoa.

6. “Le ho tlotsa sehalalelisiso.” Sehalalelisiso seo ho buuoang ka sona mona ha se motho empa ke sebaka. Ka hoo polelo ena e bua ka tlhomasiso ea ho qala ha bosebeletsi ba Krete ba bobuelli sehalalelisong sa leholimo (Ba-Heb. 8:1).

Alemanaka ea Boprofeta

Qetellong ea pono ea matsatsi a 2,300 a baloang mantsiboea le hosasa, moprofeta o maketse hobane o sitoa ho utloisisa (Dan. 8:27). Lilemo tse leshome hamorao, Gabriele o tla ho thusa Daniele ho “Utloisisa” pono (Dan. 9:23). Tšenolo ena ea morao e fana ka litaba tse haellang ‘me e senola mosebetsi oo Mesia a tlang ho o phetha ho ea qetellong ea libeke tse mashome a supileng. Ho latela molao oa selemo-letsatsi le tatellano ea liketsahalo tse boletsoeng, libeke tse mashome a supileng li lokela ho utloisoa e le lilemo tse 490. ‘Me nako ena e qala ha ho fanoa ka taelo ea ho tsosa le ho aha Jerusalema (Dan. 9:25). Taelo ena e fanoa ke morena Artaxerxes ka 457 B.C. E lumella ba-Juda katlas’a boetapele ba Esdrase ho aha Jerusalema (Esdrase 7). Ho latela temana ea Bibeke, libeke tse mashome a supileng li “baluoe” kapa li “hloauoe.” Sena se supa hore nako ea lilemo tse 490 li hloauoe ho tsoa nakong e ‘ngoe e teletsana, ke hore, ho tloha lilemong tsena tse 2,300 tse boletsoeng ponong ea Daniele 8. Hona ho bolela hore lilemo tse 2,300 le lilemo tse 490 li lokela e be li na qala ka nako e le ‘ngoe, e leng, 457 B.C.


Boprofeta ba libeke tse mashome a supileng bo arotsoe likoto tse tharo: libeke tse supileng, libeke tse mashome a tšeletseng a metso e ‘meli, le beke ea bomashome a supileng. Libeke tse supileng (lilemo tse 49) li lokela e be li bua ka nako eo ka eona Jerusalema e tla beng e tsooa. Kamorao ho libeke tsena tse supileng, e tla ba libeke tse mashome a tšeletseng le metso e ‘meli (lilemo tse 434) tse lebisang ho “Motlotsuoa Morena” (Dan. 9:25). Ka mokhoa o joalo, lilemo tse 483 kamorao ho taelo ea Artaxerxes, ke hore, ka selemo sa A.D.27, Jesu Motlotsuoa oa kolobetsoa ebile o tlotsoa ka Moea o Halalelang bakeng la bosebetsi ba hae ba botlotsuoa.

Bohareng ba beke ea bomashome a supileng, ho tla etsahala liketsahalo tse ling tsa bohlokoa: (1) “Motlotsuoa o tla tlosoa” (Dan. 9:26), e leng se supang lefu la Krete. (2) Motlotsuoa “O tla hlaba selekane se matla le ba bangata ka veke e le ‘ngoe” (Dan. 9:27). Bona ke bosebetsi bo khetheleng ba Jesu le baapostola ho sechaba sa ba-Juda. Bo etsoa “bekeng” ea ho qetela, ho tloha A.D. 27 ho ea ho 34. (3) “ ‘Me mahareng a veke o tla felisa sehlabelo le nyehelo” (Dan. 9:27). Lilemo tse tharo le halofo kamorao ho kolobetso ea Hae (ke hore, bohareng ba beke), Jesu o felisa litšebeliso tsa mahlabele—ka hore ha li sa na bohlokoa ba boprofeta—ka ho iketsa sehlabelo sa ho qetela se phethahetseng sa Selekanane se Secha, ka mokhoa o joalo a emisa bohloki ba mahlabele a liphoofolo. Beke ea ho qetela ea boprofeta ba libeke tse 70 e fella ka A.D. 34, ha Setefane a bolaeloa tumelo, ‘me molaetsa oa evangeli o qala ho fihlela e seng ho ba-Juda feela empa le ho Balichaba.

Bala Daniele 9:24–27. Le har’ a tšepo e kholo le tšepiso ea Mesia, re ntse re bala ka likhoka, nto, bofeliso. Taba ee e ka re thusa joang ka ho re tiisetisa hore le har’ a litlhokotsi tsa bophelo, tšepo e ntse e le teng?

Ho Ithuta Haholoanyane:

Ka tlase ke tafole e hlalolang hore na boprofeta ba libeke tse 70 ba Daniele 9:24–27 bo hokahana le ho thoma qalo ea boprofeta ba Daniele 8:14. Haeba u bala lilemo tse 2,300 ho tloha 457 B.C. (u hopole ho hlakola selemo se sieo sa haoletho), u fumana 1844; kapa, haeba u bala lilemo tse setseng tse 1810 ho tloha ho A.D. 34 (2,300 ha u tlosa lilemo tsa pele tse 490), u ntse u fihla ho 1844. Ka mokhoa o joalo, ho hloekisoa ha sehalalelisiso ho ho Daniele 8:14 ho ka bontšoa ho qala ka 1844. Hlokomela, hape, kamoo selemo sa 1844 se lumellanang le seo re se boneng ho Daniele 7 le 8 kateng. Ke hore, kahlolo ea Daniele 7, eo e leng ntho e le 'ngoe le ho hloekisoa ha sehalalelisiso ho Daniele 8 (sheba lithuto tsa beke tse peli tse fetileng), e qala kamor'a lilemo tse 1,260 tsa lithoriso (Dan. 7:25) feela pele ho ho Tla ha Bobeli ha Jesu le ho thehoa ha 'muso oa Hae o sa feleng.



Lipotso tsa Puisano:

1. Baithuti ba re, 'me ka nepo, e feela boprofeta ba matsatsi a 2,300 le boprofeta ba libeke tse 70 ke boprofeta bo le bong. Ke hobaneng ha ba cho joalo? Ke bopaki bo fe boo u ka bo fumanang ho tiisa taba ee?
2. Re ka ithuta eng thapelong ea bobuelli ea Daniele e ka re thusang bophelong ba rona ba ho rapella ba bang?
3. Schlabelo sa Kreste bakeng sa rona ke eona feela tšepo ea rona. Taba ee e ka re thusa joang ho lula re ikokobelitse, le hoa bohlokoa ka ho fetisa, ea re etsa batho ba nang le lerato le tšoarello ka ho fetisa ho ba bang? Luka 7:40–47 e lokela ho re'ng ho rona bohle?
4. Bona kamoo Lengolo le leng khubung ea thapelo ea Daniele le tšepo ea hae. Haholo hobane, sechaba se se se hlotsoe hampe feela, sa isoa kholehong, naha ea senngoa, le motse-moholo oa bona oa roritloa. Feela o ntse a na le tšepo ea hore, le har'a tsena tsohle, sechaba se tla khutlela hae. Ke haeba tšepo e kaale a e nkile kae ha e se Bibeleng le litšepisong tsa Molimo tse ngoliloeng ho eona? Taba ee e lokela ho re bolella eng ka tšepo eo re ka bang le eon le rona ka lebaka la litšepiso tse Lentsoeng?